


冊府元龜

五百九十六之七

百七十九




三〇〇	五三四五	漢書門
冊	架	函
架	號	類

三五	五三四五	漢書
函	架	冊
架	號	類

內閣文庫	
番號	漢 5345
冊數	300 (179)
函號	365 6



冊府元龜



淮南李嗣京叅閱

西極文翔鳳訂正

豫章黃國琦較釋

掌禮部 三十四

謚法 希旨 繆妄

謚法第二

唐鄭珣瑜為相卒贈尚書右僕射太嘗博士徐復議
請謚文獻兵部侍郎李巽駁曰夫謚所以昭德德既
昭矣則文無以加焉故相國鄭公端操持立寡言慎

行及居台司有蠲逋恤人之美有知難不汙之節雖無文若之進拔無孟子之是非無賑施之仁無謗之義然足以稱賢相也夫文者大則經緯天地次則潤色玉猷周文以至德爲西伯季孫以道事其主咸謚曰文爲美無以尙矣亦焉用兩字然後爲備哉竊觀兩字之謚或有兼德一字不足以盡盛德之形容故有兩字生焉然亦興於近古非三代兩漢之事也夫舉典之道信其正不信其邪春秋大旨也則兩字之謚非春秋之正也故相國鄭公之謚爲文足矣焉用獻哉爲獻可矣焉用文哉兩字兼謚切所未論請

下太嘗重議太嘗博士徐復議曰鄭珣瑜令德清規坐鎮風俗理人而善政浹洽作相而謀猷密勿其終始事跡當時罕備所以表賢易名實曰文獻夫文者煥乎大行獻者軒然高名今而褒之厥有經義亦猶貞惠文子累數其功至於再三以勸事君者今奉駁議議其無進拔無是非無賑施無謗且曰二字之謚非三代兩漢事愚以爲巽之駁所謂進拔者豈不推擇群萃致之於庭乎珣瑜往司銓衡暨當均軸流品式敘英髦在朝若無獎拔之明則何以至此但如來議寡言慎行故其端兆不可得而窺也當先朝之

日上體不平姦臣王叔文招權作朋將害於國其視丞相如無也輕詣相府不循舊章珣瑜意雖難誅力固不足移疾高謝萬情所歸則是非之明孰大於此夫所謂賑施者在禮家施不及國賢人君子廣愛爲心莫不開稱物之源布厚生之政曩者恤災患免逋租亦旣當之矣其於篤親庇族衣無嘗主踐名教者誰則不行若以分孤寡之資同於賑施則珣瑜所羞言也奚謂無哉至如蹇蹇匪躬前議已書其微婉矣旣承高論敢不指明德宗季年李實爲京兆尹殊恩晝接貴幸無比而實以羨餘稱代莫之敢非珣瑜衆

詰所繇上陳利害且日取於人而未讐其直焉得有餘是其言不可謂之無蹇諤矣伏以國朝宰輔謚文而兼字者代有人焉故房玄齡謚日文昭狄仁傑謚日文惠魏徵陸象先蘇環宋璟張說崔祐甫竝謚日文貞劉仁軌劉幽求姚元崇裴耀卿張九齡竝謚日文獻李元紘韓休竝日文忠薛元超日文懿盧懷慎日文成蘇頌日文憲楊綰日文簡其餘不可悉數若以文包羨不宜以他字配之則房玄齡狄仁傑以降昭惠貞獻忠懿成簡皆不得正矣我唐聲名文物二百年更閱群才發揮王度豈擬名之典獨未得中邪

不然何輕沮之爲駁正所設但當論謚之當否不安
詰字之多少苟有不當雖一字可乎若皆允宜雖二
字何害如常巨源附會兗黨李非海奪其嘉名所言
至公人則悅服今旣曰賢相而又非之君子於其言
豈得苟而已乎若曰二字非三代兩漢之規則又異
乎愚所學者矣夫威烈慎靚周王之文謚也文脩文
成漢祖之佐命也霍光爲宣成孔光爲宣烈中代之
勲德也劉寬爲昭烈楊賜爲文烈東都之勳臣也安
謂其無二字哉况文之爲名其義多矣有經緯天地
焉有忠信節禮焉有寬立不攝堅強不暴焉有敏而

好學不耻下問焉夫匪一端各有所當若皆西伯季
孫之德然後可稱文則魯侯與文伯歟之類皆不爲
文矣故誅謚之制因時旌別前狀議珣瑜之行曰爲
一代之名臣斯其旨歟謹上採禮經旁觀舊史叅諸
國典以定二名請依前謚曰文獻兵部侍郎李巽再
議曰鄭珣瑜兩字之謚今太嘗請依前謚曰文獻者
夫謚者春秋褒貶之旨也仲尼書法隨類推廣雖一
字褒貶其文猶博蓋欲指明事業以昭示後代俾後
之人懲其惡而勸其善政不可苟夫謚一字正也堯
舜禹湯周公邵公是也兩字非正也故謚法不載或

人臣不守彝章苟逞異端威烈慎覲是也或時主之權以功德加厚於臣也蕭何霍光房玄齡魏徵是也不加而加僭也孔光劉寬薛元超李元紘是也三字過也貞惠文子是也亦謚法所不載也古今無有也公叔文子謚衛君之過也衛之亂制也不然則記之失也以一善加一字卽堯舜禹湯當累數十字以爲謚也夫禮記者非盡聖賢之意也非盡宣尼所述也當時雜記也昔后蒼爲曲臺記其弟子戴聖增損刊定爲小戴禮今禮記是也若盡宣尼所述卽戴聖豈得而增也昔宣尼脩春秋游夏不能措一詞以知禮

記非盡宣尼所述故戴聖得以增損也則貞惠文子之謚衛君亂制也古今無有也非宣尼所述又何足法哉鄭珣瑜和茂修整始終無缺可謂美矣至於議行考功而度越等輩比於鄭文成梁文昭魏文貞則不侔而謚號無差輕用國典失春秋之旨矣向者鄭梁數公皆經綸草昧輔翼興王以道輔君致於化洽彰灼千古言之者凜然生敬而以珣瑜齒之豈無愧於心哉夫數公者皆時王感風雲之會懷謨明之美故加於嘗典以明其行亦所以篤君臣之義也然非正也權制也若後之人非數賢之比則當循嘗以避

數賢地也其劉仁軌薛元超李元絃等加字之謚皆
贖國典而昧彝倫言之可爲寒心豈當舉之爲訓也
其餘姚元崇宋璟劉幽求或輔相一代致理平之化
或忘身徇難成中興之業又豈珣瑜之比以典選爲
進善以辭疾爲嫉邪皆尙口爲辨非守典確論也夫
以典選者皆爲進善邪若然者則國家有天下二百
年何裴行儉馬戴盧從愿等數賢獨見稱於時也循
資置署謂爲進善異乎余所聞也又珣瑜之病數月
而終豈僞疾邪借使僞疾尤可怪也昔子路之冗食
家臣尤殺身徇難而珣瑜履台輔之重當危難之際

居平則享其高爵厚祿見危則奉身自保以此爲是
非之明卽董狐之書趙盾爲妄作也珣瑜之辭可質
於太嘗舉以爲德信君臣之義非嘗人所知也珣瑜
之下詰李實誠中其病可謂美矣然則珣瑜自始筮
仕至於啟手足垂四十年歷諫職持風憲特中規激
發恐有過此者今太嘗舉其下詰李實未爲多也謂
爲謬者衆豈能使汲黯魏徵有慙色哉前巽議云
三代兩漢無二字之謚此未學之過也無荀令君之
進善無孟軻之是非無文子之賑施無周舍之謬謬
以珣瑜之行清而無缺可謂掩之不足辨也今所議

兩字之謚亦又不當其議固不足斥也前異之言過也但兩字之謚加等之美以蕭何房玄齡言不在珣瑜也異雖不敏至於言謚美以惑人聽此當所激切而不平也終不欲有僭齒於蕭何房玄齡之宗不欲有造次擬於魏文貞姚元崇宋璟劉幽求之讜言悟主茂績殊勲也夫前車之覆後車所以易轍也前有司之失後有司則當以矯之也不矯則逶迤遂遠以至於亂制也此有國之誠也威烈慎覲孔光劉寬薛元超李元絃之同於禹湯文武蕭何霍光房玄齡魏徵前有司之過也後之專筆削則宜有以矯之典禮

寢亂矣有司不可以尤而効之也不可黨所見而遂僭典也鄭珣瑜兩字之謚請下太嘗重議若一字不足盡珣瑜之盛德必須兩字則敢候再告敬從復議謚文獻

元載爲中書侍郎同中書門下平章事誅死太嘗博士崔韶請謚曰荒左司郎中韋孔景請下太嘗重議博士王炎改謚成縱二議交持故事不行爾後太嘗王彥威議曰元載謚成則不得爲縱縱則不得爲成成縱並施美惡齊致考之嘗法實不通經夫蕭瑀謚貞詔命加福事出恩制不可擬據依爾後崔韶以平

厲謚楊炎以壯繆易伊慎此皆感於貞福混淆不可
之文詳在駁議今明其說恐悞後來事寢不報
王士貞爲成德軍節度使卒以其子承宗不順不加
謚太嘗博士馮宿以爲懷柔之議不可遺其忠勞遂
加之美謚

李吉甫爲宰相薨太嘗謚爲恭懿博士尉遲汾請爲
敬度支郎中張仲方駁議曰古者易名請謚禮之典
也處大位者取其巨節茂諸細行垂範當代昭示後
人然後書之垂於不朽善惡不可以誣故稱一字則
至明矣定褒貶是非之室異紛綸之論贈司徒

吉甫稟氣全才乘時佐維博涉多藝含章炳文燮贊
陰陽經緯邦國惜乎通敏資性便媚取容故載踐樞
衡疊致台衮大權在已沉謀罕成好惡徇情輕脫寡
信諂淚在險遇便則流巧言如簧應機必發夫人臣
之翼戴元后者端恪致治孜孜夙夜緝熙庶績平章
百揆兵者凶器不可從我始及乎伐罪則料敵以成
功至使內有害輔臣之盜外有懷毒蠱之孽師徒暴
野戎馬生郊皇上肝食宵衣公卿大夫且慙且耻農
人不得在畝績婦不得在桑耗賦歛之嘗貲散帑廩
之中積微邊徼之備過運輓之勞僵尸流血齒豁成

岳毒痛之病號訴無辜勦絕群生迨今四載禍胎之
兆實始其謀遺君父之憂而豈謂之先覺者乎夫論
大功者不可以妄取不可以枉致爲資畫著體理不
顯不競而豈妨令美當削平西蜀乃言語從侍之臣
擒剪東吳則許謨廊廟之輔較其功則有異言其力
則不倫何捨其所重而錄其所輕收其所小而畧其
所大且奢靡是嗜而曰愛人以儉受授無守而曰慎
才以輔斥諫諍之士於外豈不近之蔽聰也舉忠烈
之廟豈不近之匿愛也焉有蔽聰匿愛家範無制而
垂法作程憲章百度乎謹按謚法曰敬者夙夜警戒

敬以直內內而不肅何以刑外憲也者刑也法也戴
記曰憲章文武又發慮憲義以爲敬恪終始載考歷
位未嘗劾一法官讞一小獄及居重位以安和平易
寬柔自處考其名與其行不類研其事與其道不昧
一定之辭惟精惟審異日詳制貽諸史官請俟蔡冠
將平天下無事然後都堂聚議亦未遲憲宗方用兵
惡仲方深言其事怒甚貶爲遂州司馬賜謚曰忠
于頔薨贈太子賓客太嘗博士王彥威議曰于頔剛
毅特立博游文藝蘊開物成務之志爲從橫倜儻之
才刺湖州復南朝舊陂以溉人田由是烏鹵生稻梁

歲時大化得丁壯之物籍者取什一代貧人租入故
輕重以濟江南卑濕送終者無懸窆封樹之制高不
可隱深則及泉土總周棺水至露將頤悉命以官地
收疾當時稱之爲蕪州則繕完隄防䟽鑿畎澮列樹
以表道決水以溉田其爲襄陽當兵少誠弄兵王師
有征軍不乏見糧師未嘗退表尅吳房朗山生得賊
將遽以兵柄授之惟誠於人有古將畧然惜其不能
善終如始奉初以還跋扈立名滿盈不戒則有司擬
議之際安可不善善而惡惡哉元洪刺郡以官事被
謫中貴人銜命部領便道之徙所路出于漢頤遽命

武士持刃捕捽洪既就執王人徒歸又不奉詔出師
而西停於鄧軍聲甚雄人聽日駭夫師出以律其出
不命時人不能識其指歸王者功成而作樂諸侯則
否頤之反旆於蔡也作文武順聖樂貞元御寓務求
寵綏有司請編優詒莫逆事出一時之澤樂作諸侯
之庭良可惜哉然則如頤者是知樂之可作而不知
禮之不可作者也迹其馭衆爲政之術蓋初以利興
害去爲已任而令行禁止其源出於法家者流文深
意苛有犯無捨至有屋誅同命之慘然未嘗別白其
罪以示顯戮人到於今而寃之洎乎天姻下浹元侯

入覲朝廷申婚姻之好復以宰相待之則文子罪官
輅而連起國獄縉紳之論浸益非之謹按謚法殺戮
不辜曰厲復狼遂過曰厲請謚爲厲或曰太保繇文
學政事而揚歷中外卒當登壇補袞之寄推於事任
亦謂難能則易其名者宜兼舉美惡二字以正褒貶
今特謚爲厲或有未安愚以爲不然夫類能而授聖
王之勸勉議謚貴當有司之職分禮經言謚蓋節以
一惠至於論譏之際要當美惡咸在細大無遺議平
易名則以優迹春秋議也况援其功不足以補過挈
其美不足以掩瑕其馭下也任威少恩其事上也失

忠與敬謚之爲厲不亦宜乎勅賜謚曰思而尚書右
丞相張正甫封勅疏奏不荅留中不下然賜謚勅封
在都省亦不下至明年張正甫改爲同州刺史所封
勅取中書門下處分宰相令都省收管竟不施行太
嘗博士王彥威又上表云聞古之聖王立謚法之意
所以彰善惡垂勸戒使一字之褒寵逾級冕之錫旉
言之貶辱過市朝之刑此邦家之禮典而陛下勸懲
之大柄也伏以故太子賓客致仕于頔頃擁節旄恣
行暴虐人神所怒法令不容擅舉全師僭作王樂侵
辱中使擒止制囚殺戮不辜誅求無度故以定謚爲

厲今陛下不忍改賜曰思誠爲聖慈實害聖政伏以陛下自臨宸極懋建大中聞善若驚從諫不倦况當統天立極之始所謂執法慎名之時一番恩光盡望徼倖且如頤之不法不道而陛下不忍焉臣恐將來不逞之徒不法不道必有如頤者衆矣此其謚也則又引頤爲例則陛下何以處之是恩發於前而弊生於後矣又臣此見長藩鎮服大僚者率多驕淫不道誅求自封貨足以藩身威足以鉞口而法吏顧望自愛或不能度糾天刑生前網已漏鯨沒後戮而就木若以李吉甫近嘗賜謚引之則吉甫之相也豈犯上

殺人乎以頤况之恐非倫比如或以頤嘗入錢助國改過求覲兩使蕃國可以贖論夫傷財而害人剥下以奉上進家財以求幸尤不可長焉自兩河宿兵垂七十年王師譴征瘡疾不絕其後張茂昭以易定來程權以滄景來故國家高爵以勸或臣申恩以俟來者而襄陽名鎮也于頤文吏也居肘腋之下有崛起之名錫之姻親始脩覲禮豈可持此况彼而以朝覲爲功乎若然者則頤雖有游夏文學龔黃政令班超之絕漢匪躬卜式之持錢助國終恐不足以彌縫惡迹降減罪名伏惟陛下以至聖至明之姿用無偏無

願之道恩繇義斷政以禮成使褒貶道存倖僥路絕
 則天下幸甚右補闕高錢上疏曰夫謚者所以懲惡
 勸善激濁揚清使忠臣義士知勸亂臣賊子畏罪忠
 臣義士雖受屈於生前死獲美名亂臣賊子雖竊位
 於當時沒加惡謚者所以懲暴戾垂沮勸孔子修春
 秋亂臣賊子懼蓋爲此也垂範如此尙不能救况又
 隳其典法乎臣風聞此事是徐泗節度使李愬奏請
 李愬勲臣節將陛下寵其勲勞賜其爵祿車服第宅
 則可若亂朝廷典法將何以沮勸仲尼曰惟名與器
 不以假人名器君子所司也若以假人是與之政也

政亡則國家從之矣于頔頃鎮襄漢殺戮不辜恣行
 克暴移軍襄鄧迫脇朝廷擅留逐臣邀遮天使當先
 帝嗣位之始貴安反側以靖四方幸免鉄鉞之誅得
 全腰領而斃誠宜謚爲繆厲以沮兇邪豈特加美名
 以惠奸惡如此則是于頔生爲奸臣死獲美謚竊恐
 天下有識之士以爲聖朝無人有此倒置伏請速追
 前詔却依太嘗謚爲厲使典法無虧國章不紊
 杜佑卒贈太傅太嘗博士柳應規謚忠簡太嘗博士
 尉遲汾又議曰佑之寬容得衆全和葆光不病於物
 類其能考終得不爲寬容乎和好不爭自卑士而極

重任一心於理以惠物潔行廉正人無尤怨得不爲
一德不懌乎請謚爲安簡
范希朝卒贈太師太嘗博士馮定請謚忠武禮部員
外郎王源中駁請下太嘗重定太嘗請如前謚忠武
王源中重駁博士王塾改謚宣
馬暢卒贈工部尚書太嘗博士林寶議謚曰敬工部
郎中崔備駁議曰謹按謚法敬字之義與馬暢始終
名跡不同考行之義尚乖易名之典未正事須再牒
禮院請重議者且以暢墳土猶濕物議尚存皆可徵
言盡堪覆視在春秋隱惡之義可也加史冊虛美之

命難乎况尚書責實當究是非易名宜存褒貶夫國
之禮法懸在不刊而文士多病於愧詞史臣或許其
使傳舊章既失後代何觀雖以禮之愛久無而亂名
之責豈絕幸稽前士用示後人其馬暢所謚爲敬請
更叅議尚書兵部員外郎韋奕駁曰太嘗考馬暢之
行舉夙夜就事廉方徑正之敬以易其名異乎無所
苟於言也比建中興元間暢以父有征討之勲推恩
而授爵位父薨家富於財以酒色自娛貞元中嘗傾
產交中官因獻田宅以求幸德宗薄其人而終不信
用生前與孤侄寡嫂分居競財醜聲聞於時歿後使

孽子孀妻披姦扶私公言盈於庭此皆章著於視聽者可以謚爲敬乎議者云先司徒之籌畫而暢揣摩者策而遺焉暢參計於閨庭之內苟所言屢中而不可隱當指明其効實而書之俾行道者無所惑不然則莊武公之才略光於典策矣而乃飾虛辭以攘其善爲子請謚得非繆濫之甚耶又稱名儒端士皆從之游未知孰爲其田蘇邪孟軻云尹公他端人也其取友必端矣夫與端士而游乎暢之門况謚法夙夜就事者以其績用已犯非謂其曠日引月以至乎終身也庶方徑正則暢處已行事未嘗造次而踐其途

焉何以謚爲敬乎大凡言功伐議德行尊其跡亦以觀善貶其名有以懲惡固非庸者事也如暢之輩烏足以黷典法哉若有司以有爲而爲之則宜乎貶之例也請下太嘗重定其謚博士崔韶改謚曰縱議曰馬暢承藉故業歷居通顯家富於財以奢縱自處不能撫安嫂侄使之離拆其干進也赴利如轉圓其居家也操下如束濕故時論鄙之謹按國史宇文士及居家侈縱謚爲縱暢之行已同於士及請以縱爲謚蔣清爲東都採訪判官死祿山之難太和三年考功奏請謚曰初安祿山反清爲留守李愷從事與愷廬

奕俱死以秩卑當時未行謚典至是其外孫吏部郎中王高上聞故追謚焉

房式卒左散騎嘗侍博士陵亘請謚曰領吏部郎中韋乾度駁曰詳觀貞元之末西蜀之事逆堅劉闢構難之初兇邪叶謀噉嚙相聚年深事遠十不記一然而魄磊不平鋒刺鬻深者藏在骨髓請舉其梗槩一二焉式自忠州刺史故太師奏授劍南西川支度副使後兼御史中丞又部符蜀州是時貞元十八年也式因晝日昏睡如醉經宿乃寤詳其左右僮僕不知其所從來後逾年却復此職會故使太師薨歿劉闢

潛扇逆謀禍亂始胎式遂倖姦人之意爲譎恠之語謂闢曰乃者蜀州昏病之中見公爲上相盧文若爲侍郎儀衛甚盛富貴極矣他日無相忘賊聞大喜而滿軍縣自以爲神授非人力也賊每接賓客肆譚論撫群邪申號令也未嘗不以是爲先浮自以爲祥兆也豈不因式作異言鼓妖孽惑亂平人堅壯克險不然何區區之蜀瓌瓌之寇王師討伐經費萬計崎嶇險阻留年乃拔何哉蓋以式浮爲浹洽之辭激切囂固不然何盤抵固根之甚也故使太師永貞元年八月薨其時乾度任殿中侍御史前使支度判官劉闢

日攝行軍司馬節度留後九月初乾度被逐攝簡州
刺史名雖守郡其實囚之明年四月追廻勒攝成都
縣令其時闢授西川節度詔命初下東川之圍未解
乃召募亡命兼收管內鎮兵張皇虛聲熒惑郡縣發
兵七千馬畜三萬號爲十五萬人轉牒墊屋以來縣
道郵次酒肉畢具芻茭無匿畧牒首日闢副曰式參
謀曰符載令下之日妖氛全興下愚沸騰貪冒姦賞
奔走叛命肩磨轂擊爭死恐後當此之時邛蜀震驚
田野廢業窳伏山谷邑居人吏分散道路如此之事
非得之於人皆親所聞觀時賊圍逼梓州又王師諸

軍稍稍旣至猖狂兇寇不復張矣然嘗察式之爲人
柔而善俛不顧不義不然何劉闢文若喬規符載皆
咨諏執禮拳拳以事之以斯而言可以知其所止矣
伏以聖上法維天之度崇納污之德雖泫澤滂流鼓
盪昭洗易名之典在正根源苟非其人不可加美如
式西蜀之事大節已虧缺矣何面目以求謚焉傾之
爲謚頗乖前狀請下太嘗專議太嘗博士李虞等重
議曰式之在西蜀也入人耳目其事孰矣固非愛之
者所能粉飾而文其論惡之者所能披抉而裝其說
蜀之此時雖女子小人亦知兇闢斷頭之不日然爲

其用者乃救死於頸語其無勇烈之心斯可矣豈可
盡披其附麗之名乎如式之於劉闢旣不能死可謂
求生害仁者也而駁議曰大節已虧無乃過言歟何
從聞之闢之走西山也召所疑畏者十數輩於庭將
盡殺之然後去而式在其間賴蒼黃之際闢黨有獲
持者僅免於難推嚮之論則不當如是明矣然居此
時有將見危授命之義殺身成仁之道詰之者稱式
無愧色愚不信也如是則式之去希烈也理河南也
蕪宣城也何以無忠敬之目歟愚論之曰式也不疾
任求之目不閉吉邑之口其罪也無王浩棄家之心

無譙玄受毒之志其罪也如闢之反天子棄墳墓乃
曰顧式說一夢以結其心畧一牒以張其勢豈其然
乎夫人臣不幸罹於是惟死而已矣然孟子曰生吾
所欲也矧自軻已下哉使死之易則王諒李業虞悝
鴻信不足貴也意者將不可以必死望人乎始以不
死罪之以懷生貶之是異論也夫謚者易其名者也
夫子曰名以出信不曰名之必可言也名不正則言
不順以至於形罰不中正謂此耳夫豈容易哉語曰
於其所不知蓋闕如也恍惚之夢駁議之外無言者
懼非所以昭示後世也臯陶謨曰五刑五用哉言用

刑必當其罪也刑其支體於一時猶須當其罪矧刑
其行義揭之於千萬年歟康誥曰敬明乃罰請依前
謚爲傾至伊慎卒贈太子太保太嘗博士崔韶請謚壯繆吏部
尚書韓臯駁議不報武崔從爲淮南節度使卒從少以貞晦恭護自處不交
權利忠厚方嚴爲正人宿儒所推階品合立門戟終
不之請四爲方鎮無聲妓之娛太嘗定謚曰貞
令狐楚爲興元節度使薨將死戒諸子曰吾生何益
於人無請謚號無受軍府賄贈葬以布車一乘無或

加飾無用鼓吹及終將葬嗣子請奉行遺言詔曰生
爲名臣歿有理命終始之分可謂兩全然以鹵簿哀
榮之末節難違往意誅謚國家之大典須守彝章鹵
簿宐停易名須准舊例太嘗謚曰文

李愬元和中平吳元濟有功及卒博士元從質謚曰
武尚書省議以其謚與父西平王晟同宜改之從質
云愬無他行以功定謚不可改也問難數四竟不能
駁其議今之定謚則不然也唯顧其勢望恐爲子孫
之嫌歸於苟且故會昌朝陳商曾爲禮部侍郎貽博
士書曰古者太嘗博士職以公卿諸侯大夫死第其

所行舉而褒貶焉使世世以一二字觀其道與不道
 拘藁言爲文武忠孝所以失褒也執已見爲繆荒椒
 醜所以失貶也二柄之失博士不得職往者不得享
 爲政者不得道夫執已見拘藁言是有上中下質其
 一二字視緡金之重輕以緡金重輕貽後之龐微偷
 忠盜貞罔世間人爲盡善加於行路皆博士忍其過
 而阿其時也夫天下人望執事以爲質正然未見有
 執事能針其膏肓之病者若當貶而褒當褒而貶是
 猶錄跡殺夷經緯混淆者也褒而褒之貶而貶之經
 紀旣著善惡懸白勸大而用微所以使後代力行不

易如日月山河江海草木四支七竅以統幹而治自
 從其教也於戲博士職蓋不細願出意念慮焉

宋申錫官至宰相爲鄭注構誣貶開州司馬會昌中
 報復官爵追謚曰穆

白居易爲太子太傅以刑部尚書致仕卒大中三年
 十二月中書侍郎平章事白敏中表請謚從之太嘗

謚曰文

又云大中十三年宰臣白敏中表請謚曰臣頃自布衣爰及仕進飽僧儒之惠義師居易

之文章斯人之亾各已數載屬先帝憂勤之際贈典未行遇陛下聖明之初謚法宜頒其將行業以傳冊書從之居易謚曰文僧儒謚曰簡

後唐朱漢賓太子少保致仕卒贈太子少傅至晉天

福二年太嘗博士林弼謚曰漢賓嘗恃倜儻不習
庶隅過鄴都姦卒之訛言時銷叛亂却華師親隨之
浮議俗致安康開國承家忠貞保義而又散已捧而
代逋欠闢荒榛而種粳粳民有袴襦之謠野無菴蒲
之患安民禁暴威惠兼行而又知進退存亡之理得
善始令終之名亦所爲知幾其神也謚法忠道不撓
保節揚名曰貞愛民好學寬裕慈仁曰惠請謚貞惠
可之

安元信爲昭義軍節度澤潞等州觀察處置等使卒
贈太師太嘗博士賈緯謚曰叨居禮職式考儒經
德雖以百行相成謚乃取一善爲定公經邦緯俗積
行累功宜立摠名用彰殊號按謚法事君盡節曰忠
體和居中曰懿左傳曰公家之事知無不爲忠也春
秋正義曰保已精粹立行純厚懿也公抑揚事任周
旋盛明嘗險阻艱難乘溫良恭儉或宣風千里有負
襁之民或布政百城致隨軒之兩道光群后功著歷
朝凡士大夫歎開幕之芙蕖父謝無賢不肖感成蹊
之桃李空存煥彼緹緡豐諸碑版令被實錄非讓古
人事君旣有忠規爲臣足以御衆復彰懿行從政備
焉前代所高斯謚爲當今請謚曰忠懿從之

錢元瓘為天下兵馬都元帥吳越國王天福八年所
 司議謚曰莊穆王奉勅改謚曰文穆王
 漢高從誨為荆南節度使南平王乾祐二年卒勅宜
 令太嘗宅謚故事臣下請謚即故吏陳行狀上考功
 覆奏下乃議謚今降勅新例也
 周劉詞為永興軍節度使薨贈中書令謚曰忠惠詞
 發身軍較亟歷戎事嘗以忠勇自負洎領藩鎮能靖
 恭為理無苛政及民謚曰忠惠議者違之

希旨

夫禮者所以定親疎決嫌疑別同異明是非也故三

代而下濬哲之主曷嘗不講求文質稽考遺墜著為
 大法垂之方來者乎然而大臣矢謨攸司奏議當執
 折衷之論用成經久之規乃有回邪其心險詖其行
 以揣摩為已任以附麗為身謀忘典冊之格言縱詭
 隨之臆說卒使舊章斯亂大政攸斃聿興相鼠之刺
 終起白圭之詠貽誚千古守官者得不鑒之哉

夏父弗忌魯大夫也文公三年有事於太廟躋僖公

逆祀也

僖是閔兄不得為父子嘗為臣位應在下令居閔上故舊曰逆祀

於是弗忌

為宗伯

宗伯掌宗廟昭穆之禮

尊僖公且明見曰吾見新鬼大

故鬼小

新鬼僖公既為兄死時年又長故鬼閔公死年少弗忌明言其見

先大後小

順也躋聖賢明也

人以僖公為聖賢

明順理也君子以為失

禮無不順祀國之大事也而逆之可謂禮乎雖齊聖

不先父食久矣

齊肅也臣繼君猶子繼父

故禹不先鯀湯不先契

鯀禹父契湯十三世祖

文武不先不啻

不啻后稷子

宋祖帝乙鄭祖

厲王猶上祖也

帝乙微子父厲王桓公父二國不以帝乙厲王不肖而猶尚之

是以

魯頌曰春秋匪解享祀不忒皇皇后帝皇祖后稷

志差

也皇皇美也后帝天也云頌僖公郊祭上天配以后稷

君子曰禮謂其后稷親

而先帝也

先稱帝也

詩曰問我諸姑遂及伯妹

衛女思歸而不得故

願致問於姊妹

君子曰禮謂其妹親而先姑也

僖親文公父夏父弗忌欲

阿時君先其所親故傳以此一詩深責其意

漢霍光為大將軍昭帝初光緣武帝雅意以李夫人

配食

緣國也雅意素舊之意

追上尊后曰孝武皇后

晉段暢為博士太尉賈充薨下禮官議充謚博士秦

秀議謚曰荒武帝不納暢希旨建議謚曰武帝乃從

之

宋徐爰為將作大匠便僻善柔能得人主微旨頗涉

書傳尤悉朝儀文帝元嘉初便入侍左右預茲顧問

既長於附會又飾以典文故為帝所任遇大明世委

寄尤重朝廷大禮儀非爰議不行雖復當時碩學所

解過人者既不敢立異議所言亦不見用孝武殷淑

儀卒既追進貴妃謚曰宣又諷有司創立新廟爰之
議宣貴妃既加殊命禮絕五官考之古典顯有成據
梁劉勰爲南康王記室兼東宮通事舍人時七廟饗
薦已用蔬菓而二郊農社猶用犧牲勰乃表言二郊
宜與七廟同改詔付尙書議依勰所陳遷步兵較尉
兼合人如故

唐許敬宗爲太子賓客高宗永徽初議者以貞觀禮
未盡詔長孫無忌與杜正倫李義府及敬宗等重加
緝定至顯慶三年奏上之時敬宗義府用事其所損
益多涉希旨行用已後學者紛議以爲不及貞觀

祀欽明爲國子祭酒中宗景龍三年十一月將南郊
欽明希旨上言皇后亦當助祭遂建議曰謹按周禮
天神曰祀地祇曰祭宗廟曰享大宗伯職曰祀大神
祭大祇享大鬼理其大禮若王有故則攝而薦徹豆
籩又追師職掌王后之首服以待祭祀又內司服職
掌王后之六服凡祭祀供后之衣服又九嬪大祭祀
后裸獻則贊贊璫爵亦如之據此諸文卽知皇后合
助皇帝祀天神祭地祇明矣故鄭玄注司服云闕狄
皇后助王祭群小祀之服然則小祀尙助王祭中大
推理可知闕狄之上猶有兩服第一禕衣第二搯狄

第三闕狄此三狄皆助祭之服闕狄既助祭小祀卽知搯狄助祭中祀禕衣助祭大祀鄭舉一隅故不委說唯祭宗廟周禮王有兩服先王衮冕先公鷩冕鄭玄因此以后助祭宗廟亦分兩服云禕衣助祭先王搯狄助祭先公不言助祭天地社稷自宐三隅而返又春秋外傳云禘郊之事天子親射其牛王后親春其粢故代婦職但云詔皇后之禮事不言主宗廟也若專主祭廟者則內宗外宗職皆言掌宗廟祭祀此皆禮文分明不合疑惑舊說以天子父天母地兄日姊月所以祀天於南郊祭地於北郊朝日於東門之

外夕月於西門之外以昭事神訓人事君必躬親以禮之有故然後使攝此其義也又禮記祭統曰夫婦親之所以備內外之官也官備則具備又哀公問孔子曰冕而親迎不亦重乎孔子愀然作色而對曰合二姓之好以繼先聖之後以爲天地宗廟社稷之主君何謂也重焉又漢書郊祀志云天地合祭先祖配天先妣配地天地合精夫婦合判祭天南郊則以配一體之誼也據此諸文則知皇后合助祭儀注同進帝意頗以爲疑召禮官親問焉太嘗博士唐紹蔣欽緒對曰皇后南郊助祭於禮不合帝問曰據何禮文

不合欽緒對曰欽明所奏執是祭宗廟禮非祭天地
禮又鄭玄王后六服最上禕衣從祭先王無祭天地
之服欽明又進對曰此實鄭玄大錯誤不可依也帝
命宰臣等取兩家狀對定奏聞欽緒遂議曰周禮凡
言祀祭享三者皆祭之雅名本無定議何以明之案
周禮典瑞職云兩珪有邸以祀地則祭地亦稱祀也
又司几筵設祀先王之祚席則祭宗廟亦稱祀也又
內宗職云掌宗廟之祭祀此又非獨天地稱祭祀也
又按禮記云惟聖爲能享帝此則祀天亦稱享也又
按孝經云春秋祭祀以時思之卽宗廟亦言祭祀也

經典此文不可備數據此則欽明所執天曰祀地曰
祭宗廟曰享未得爲定明矣又周禮凡言大祭祀者
祭天地宗廟之摠名非獨天地之爲大祭也何以明
之按爵人職云大祭祀與量人受舉筭之卒爵按尸
與筭皆宗廟之事則宗廟亦稱大祭祀又欽明狀引
九嬪職凡大祭祀后裸獻則贊璠爵據祭天無裸獻
亦無璠爵此宗廟稱大祭祀之明文欽明所言大祭
祀卽爲祭天地未得爲定明矣又周禮大宗伯職云
凡大祭祀王后有故不與則攝而薦豆籩徹欽明唯
執此文以爲王后有祭天地之禮欽緒等據此文乃

是王后薦宗廟之禮非祭天地之事何以明之按此文凡祀大神祭大祇享大鬼師執事而十日宿視滌濯漉玉鬯省牲鑊奉玉盞制大號理其大禮詔相王之典禮若王不與祭祀則攝位此皆宗廟之事故通言大神大祇之祭也下文云凡大祭祀王后不與則攝而薦豆籩徹此一凡直是王后祭宗廟之事故惟言大祭祀也若云王后合助祭天不應重起凡大祭祀之文也爲嫌王后有祭天地之疑故重起後凡以別之耳王祭宗廟自是大祭祀何故上凡相天王之禮以混下凡王后祭宗廟之文此是本經科段明白

又按周禮外宗掌宗廟之祭祀佐王后薦玉豆凡后獻亦如之王后有故不與則宗伯攝而薦豆籩徹外宗贊之內宗外宗所掌皆佐王后宗廟之薦本無祭天地之禮但天地尙質宗廟尙文玉豆宗廟器物非祭天所設請問欽明若王后助祭天地在周禮使何人贊佐若宗伯攝后薦豆祭天又合何人贊佐竝請明徵禮文卽知攝薦是宗廟之禮明矣按周禮司服云王祀昊天上帝則服大裘而冕享先王則衮冕內司服掌王后祭服無王后祭天地之服案三禮義宗明王后六服謂禕衣撝翟闕翟鞠衣展衣祿衣也禕

衣從王祭先王則服之搢翟祀先公及享諸侯則服之鞠衣以求桑則服之展衣以禮見王及見賓客則服之祿衣燕居則服之王后無助祭於天地之服但自先王已下及三禮義宗明王夫人之服云后不助祭天地五嶽故無助祭天地四望之服按此則王后無祭天地之服明矣又三禮義宗明王后五輅謂重翟厭翟安車翟車輦車也重翟者后從王祭先王所乘也厭翟者后從王享諸侯所乘也安車者后宮中見於王所乘也翟車者后親桑之所乘也輦車者后遊宴之所乘也按此則王后無祭天之車明矣禮記

郊特牲義贊云祭天地無裸鄭玄注云唯人道宗廟有裸天地大神至尊不裸圓丘之祭與宗廟祫同朝踐王爵泛齊以獻是一獻按此无祭天之事大宗伯次酌禮齊以獻是二獻按此則祭圓丘大宗伯次王爲獻非攝王后之事欽明等所執王后有故不預則宗伯攝薦豆籩是攝王后宗廟之薦非攝天地之祀明矣欽明建議引禮記祭統曰夫祭也者必夫婦親之按此是王與后祭宗廟之禮非闕祀天之義按漢魏晉宋後魏周陳隋等歷代史皇后無助祭之事又高祖神堯皇帝太宗文武聖皇帝南郊祀天無皇

后祭處高宗天皇大帝永徽二年十一月辛酉親有
事於南郊又摠章元年十二月丁卯親拜南郊亦無
皇后助祭之禮又按大唐禮亦無皇后南郊助祭之
禮欽緒等幸忝禮官親承聖問竭盡聞見不敢依隨
伏以主上稽古志遵舊典所議助祭實無明文若以
王者制禮自我作古在明主聖斷非臣下敢言國子
司業褚無量又議曰夫郊祀者明王之盛事國家之
大禮行其禮者不可以臆斷不可以情求皆上順天
心下符人事欽若稽古率繇舊章然後可以交神明
可以膺福祐然禮文雖衆莫如周禮周禮者周公致

太平之書先聖極繇衷之典法天地而敷教化辨方
土而教人倫其義可以幽贊神明其文可以經緯邦
國備物致用其可忽乎至如冬祀圓丘祭中最大皇
后內主禮位甚尊若今郊天助祭當具著禮典今遍
簡周官無此儀制蓋繇祭天南郊不以地配唯將始
祖爲主不以祖妣配天故唯皇帝親得行其禮皇后
不合預也謹按大宗伯職云若王祭祀則攝位注云
王有故代行其祭事下文凡大祭祀王后不與則攝
其薦豆籩徹若皇后合助祭承此下節當云后若不
與祭祀則攝其薦豆籩於文上更起凡明是別生餘

事矣是則上異則別起凡凡者生上起下之名不專繫於本職周禮一部之內此例極多備在文中不可具錄又王后助祭親薦豆籩而不親徹按九嬪云凡祭祀贊后薦徹豆籩皇后進之而不徹者爲宗廟祭則宗伯親徹不別使人又按外宗掌宗廟之祭祀王后不與則贊宗伯此之一文與上文相證何以明之按外宗唯掌宗廟祭不掌郊天足明此文是宗廟祭也又按王后行事摠在內職中簡其職文唯云大祭祀后裸獻則贊瑤爵亦如之鄭注謂祭宗廟也注所以知者以文云裸獻祭祀無裸以得知又祭天之器

則用陶匏亦無瑤爵注以此知是宗廟也又內司服掌王后六服無祭天之服而巾車職掌王之五輅亦無后祭天之輅祭天七獻無后亞獻以此諸文參之故知后之不合助祭天也唯漢書郊祀志則有天地合祭皇后預享之事此則西漢末代疆臣擅朝悖亂彝倫黷神誦祭不經之典事涉誣神故易傳曰誣神者殃及三代秦誓曰正稽古立功事可以永年天之律斯史策之良戒豈可不知今南郊禮儀事不稽古忝守經術不敢緘默請詢碩儒俯考典臺之故事行圓丘之正義使聖朝叶昭曠之途天下知文物之

盛豈不幸甚時定儀注官尚書左僕射韋巨源又希
皇后旨叶同欽明之議奏言皇后合助祭請依欽明
議爲定帝納其言竟以皇后爲亞獻大臣李嶠等女
爲齊娘執籩豆焉欽明又以安樂公主獨任權勢欲
請公主爲終獻遂引南郊儀注謁者引終獻以爲女
相唐紹及蔣欽緒與之固爭欽明止遂以尚書左僕
射韋巨源爲終獻

王璵少習禮學博求祠祭儀注以干時開元末爲太
嘗博士侍御史充祠祭使璵專以祀事希倖其祭祀
之制或焚紙錢禳祈福祐近於巫者以是稍承恩遇
肅宗卽位累遷太嘗卿亦以祀事見寵

繆妄

夫學不足以待問智不足以體遠罔識損益之理靡達
弛張之訓亦何足以議乎禮經之制作矣中代而下
去聖逾遠師資出於淺近討論乖於通博以致叅掌
厥事或非其人草創之初罔克稽古違失經旨貽儒
先之誚紛錯儀範著史氏之譏斯亦出於獨見因其
失傳寢以成非罔之能正其或乘其繆誤恣乎封執
黷祭違禮徇情失度垂之後世良可惡哉

漢武帝元鼎中令諸儒習射牛草封禪儀數年至且

行而群儒既以不能辨明封禪事又拘於詩書古文
 而不敢騁帝為封祠噐視群儒視讀曰示群儒或曰不與
 古同徐偃又曰太嘗諸生行禮不如魯善徐偃傳周士姓名
 霸屬圖封事屬音之欲切會也會諸儒圖封事也周霸人姓名於是帝黜偃
 霸而盡罷諸儒弗用

魏文帝黃初二年正月乙亥祀朝日於東門之外遣

禮二分之義

禮春分祀朝日於東秋分祀夕月於西今正月非其時也

明帝景初元年六月有司奏武皇帝撥亂反正為太祖樂用武始之舞文皇帝應天受命為高祖用咸熙之舞帝創作興治為烈祖樂用章武之舞三祖之廟

萬事不毀其餘四廟親盡迭毀如周后稷文武廟祧

之制

孫盛曰夫謚以表行廟以存容皆於既沒然後著焉所以原始要終以示百世也未有當年遂

制祖宗未終而預自尊顯昔華樂以厚塋致譏周人以豫凶違禮魏之群司於是乎失正

蜀後主景耀六年詔為丞相諸葛亮立廟於沔陽先是亮初亡所在各求為立廟朝議以禮秩不聽百姓遂因時節私祭之於道陌上言者或以為可聽立廟於成都者後主不從步兵較尉習隆中書郎向充等共上表以為因宜近墓立之於沔陽聽親屬以時祀祭凡其臣故吏欲奉祀者皆限至廟斷其私祀以崇正禮於是始從之

何承天曰周禮凡有功者祭於大烝故後代尊之以元勳配享克等

曾不是正後主又從之並非禮也

晉元帝大興元年立南郊於巳地非禮所謂就陽位之義也

南出道狹未議開闢遂於東南巳地創立丘壇

四年四月始有司奏應報賽宗廟山川詔曰祈廟云賽非奉尊下辭吾意有疑以為舊山川有許報故兩賽非大事不應告廟臣子無要君之道黷祭稱賽於禮有違

成帝咸康二年臨軒遣使兼太保領軍將軍諸葛恢兼太尉護軍將軍孔愉六禮備物拜皇后杜氏即日入宮帝御太極殿群臣畢賀非禮也

禮娶婦之家三日不舉樂而禱

臣賀為失禮

宋孝武末公除後晉安王子勛侍讀博士諮將作大匠徐爰宜習業與不爰荅曰居喪禮習業何嫌少始安王子真博士又諮爰曰小功廢業三年喪何容讀書其專斷乖謬皆此類

明帝時廷尉虞和議社稷合為一神散騎嘗侍王琨按舊糾駁時和深被親寵朝廷歎琨強正
唐德宗貞元九年十二月葬故太師李晟帝御南望春門臨送之又令中人宣詔於柩車文武嘗參官哭拜於路太嘗卿裴郁草儀誤引令中書隔品致敬之

冊用六部 繆安
文乃請宰相及二品以上者哭而不拜送葬不拜禮
官失也

穆宗元和十五年正月卽位六月勅宗廟之禮嚴肅
居先薦告之詞精審爲切方將昇附安可九室皆同
既已祧遷豈宜四昭咸在宗正少卿李子鴻實司祀
事誤進祝文罪有根源理難降減宜停見任博士既
失於詳定御史又曠其監臨若不薄懲恐乖至敬王
彥威宜罰兩月俸料削一階崔鄆宜罰一季俸削兩
階其後禮合變文事宜中節者太嘗博士不得更稱
舊制致有差殊故事將有祔禮先告於太極殿然後

奉神主赴太廟侍中於廟庭跪奏八室曰以今吉辰
某皇帝神主祔謁遂奉神主詣第七室祔饗而不再
告饗畢祔於第九室設安神之幕而絜之然則告於
太極殿不再告於太廟以孫祔於祖尊不得申也是
時憲宗神主升祔宰臣不詳舊典今有司再告祔禮
於太極殿禮官執議不聽適屬宗正寺進祝板誤以
憲宗尊號爲睿宗御史士職當省察不知其誤宰臣
兼怒之遂下詔削罰而變其舊禮時甚非之

長慶元年正月辛丑郊社禮畢太赦天下宣赦畢宰
臣率百寮稱賀於樓前伏退帝朝太后於興慶宮先

是南郊禮畢不設御榻帝立受群臣稱賀及御樓使
退百僚復不賀於興慶宮舉大典而有二闕皆有司
之過也

文宗太和五年六月貶權知太嘗博士權安爲河南
府兵曹參軍安在險以朋附得官好持論而無依擬
以博士定故宰相韋處厚謚議逞私憾誣枉不實朝
論雜然非之故有是命

後唐明宗天成四年五月中書奏先據太嘗寺定少
帝謚昭宣光烈孝皇帝廟號景宗伏以本朝基構垂
三百年昭宗以中否東遷少帝以沉寃冥駕始封侯

於僞室新立廟於聖朝追奕世之尊雪當時之耻先
皇帝初定中原之後昭宗少帝尋合一時入廟所司
不舉遂成闕禮既睽昭穆難會蒸嘗太廟有合食之
儀外邑無登歌之奏生曾爲帝享乃承祧既號景宗
合入太廟如不入廟難以言宗須叶徽章免貽群議
於理而論桃以遠廟安少帝神主於太廟卽昭穆序
而宗祀正今或且居別廟卽欲不言景宗只云昭宣
光烈孝皇帝兼冊文內有基字是玄宗廟諱尋嘗泛
行詔勅皆不迴避少帝是繼世之孫冊文內不欲斥
列聖之諱今改基爲宗字勅皆可之論者以爲追尊

之廟謚不稱宗於禮得矣。至如云生曾爲帝享，乃承祧卽子孫繼嗣以宗祧爲本明矣。下文復云祧一遠廟安少帝於太廟則祧之一字義有兩說。乎時人多謂祧字爲祧去之祧禮則不然。按祭法云遠廟爲祧有二祧鄭玄解祧者超也謂超然上去之意。孔穎達正義云遠廟爲祧五世而遷之主藏於祧廟去祧爲壇去壇爲墠所謂遠廟者卽始祖之廟也。五世之後合遷之例以其有德百世不遷故謂之二祧。文王武王是也。高祖太宗是也。祧與遷異義在此矣。又云冊文中有基字是玄廟諱。夫先王制禮貴在折中君

子有終身之憂三年之喪豈盡其情哉。賢者俯而及之欲重其制也。五世不諱所謂報之極也。按風俗通陳孔璋議諱云尊尊有節親親有殺喪祭哀敬各有攸終欲令言著而可遵事施而不犯禮云卒哭之後宰執木鐸徇於宮曰舍故而諱新故者卽毀廟之主也。恩遠屬絕名不可諱。今昭宣皇帝上去玄宗十五世矣。奏改冊文以避遠諱將以垂法信不與也。如或上無所斷下無所齊卽百代之主皆可避也。舍故諱新寧虛語乎。名不正則至於人爲無所措手足制禮作法可不慎歟。

周世宗顯德元年十月太嘗禮院上言去冬遷宗社於浚都其諸祠郊壇奉勅依四京制度修築伏緣司寒神元在兩京後園水井所祠祭未審且在彼祭為復於此勅曰據月令孟冬祭司寒於北郊其司寒一祠一旦准月令施行藏冰開水祭司寒之神事屬別祭後有冰室尚取指揮時田敏以鴻儒為太嘗卿朝廷之內禮義差失謂可質正而司寒小祀不能按故實舉行翻以水井為請中書止引月令命正之大為士子所笑

冊府元龜

冊府元龜

淮南李嗣京叅閱

西極文翔鳳訂正

豫章黃國琦較釋

學較部

總序

古者家有塾黨有庠術有序國有學然則有虞氏之米廩夏后氏之序商之瞽宗周之類宮皆學也又云夏曰較商曰序周曰庠故樂正崇四術立四教順先王詩書禮樂以造士王太子王子群后之太子卿大夫元士之適

子國之僑選皆造焉周官小司徒之職師氏掌以三德三行教國子保氏掌養國子以道乃教之六藝又春官大司樂掌成均之法以治建國之學政而合國之子第大胥掌學士之板以待致諸子小胥掌學士之徵令而比之太師教以六詩六德六律籥師掌教國子舞羽歛籥皆其事也秦置博士掌通今古漢興武帝初置五經博士掌教弟子國有疑事掌教問對本四百石升比六百石初文帝欲廣遊學之路論語孝經孟子爾雅皆置博士至是遂罷傳記博士平帝元始中立學官郡國曰學縣道邑侯國曰較較學置

經師一人鄉曰庠聚曰序序庠置孝經師一人後漢光武愛好經術立五經博士凡有一十四人太嘗差次總領焉取聰明有威重者一人爲祭酒秩六百石建武五年乃脩起大學稽式古典中元元年初建三

雍宮

明堂碑雍靈臺也

至明帝親行其禮靈帝光和初置鴻

都門學魏文帝黃初中立大學置春秋穀梁博士晉承魏制置博士十九人武帝咸寧四年初立國子學以教生徒而隸屬大學定置國子祭酒博士各一人助教十五人以教生徒博士皆取履行請淳通明典義者若散騎嘗侍中書侍郎太子中庶子以上皆得

召試元帝初減國子祭酒博士助教為九人大興中
 又置周易儀禮公羊博士末年增國子儀禮春秋公
 羊博士各一人合為十一人後又增為十六人不復
 分掌五經而謂之大學博士秩六百石孝武太元中
 損國子助教為十員宋國子祭酒若不置學則助教
 唯置一人明帝泰始中以國學初置總明觀真儒文
 史四科科置學士各十人正合史一人書令史二人
 幹一人門吏一人典觀吏二人齊高帝建元中有司
 奏置國學於南臺御史選經學為先居其人難備給事中
 以還明

經者以本位領其下典學二人三品准太常主簿戶
 曹各二人五品白簿治禮吏八人六品得學醫威儀
 各二人其夏廢學有司奏省助教以下又有聰明觀
 祭酒一人掌治五禮大始六年以國學廢初置永明
 三年國學建遂省梁國子祭酒人班第十三比列曹
 尚書又置國子博士二人為九班助教班第二又置
 大學博士八人班第三又置五經博士各一人陳國
 子祭酒秩中二千石品第三博士品第四秩千石國
 子助教學博士並品第八秩六百石律學博士秩
 品亦同後魏道武始建都邑便以經術為先立大學



置五經博士大武又別起大學於城東獻祖又立郡學置博士二人助教二人後詔大郡立博士二人助教四人次郡立博士助教各二人中郡立博士一人助教二人下郡立博士助教各一人孝文改中書學爲國子學建明堂辟雍及遷都雒邑又立國子大學四門學宣武又詔營國學櫛小學於四門國子祭酒本第四品上後增爲從三品國子博士從第五品上後增爲第五品國子助教五人從七品大學博士第六品後降爲第七品大學助教第八品中四門博士第九品律博士第六品中後降爲第九品上北齊國

子寺掌訓教胄子祭酒一人從三品又置工曹五官主簿錄事等員博士五人品第五助教十人大學博士十人從第七品助教二十人從第九品四門博士二十人正九品上亦有助教二十人後周依周禮建六官之職春官大學博士下大夫四命助教及小學博士上士三命皆國子監之屬官也祭酒無聞焉武帝又立露門學隋國子寺置皇中隸太嘗祭酒一人屬官有功曹主簿錄事各一人統國子大學書筭學各置博士國子大學四門各五人書筭各二人助教國子大學四門各五人書筭各二人仁壽初罷國子

唯置大學煬帝改太學爲國子監初置司業一人丞
三人唐置國子監祭酒司業之職掌邦國儒學訓導
之政祭酒一人司業二人屬官有丞主簿錄事府史
亭長掌固等員國子博士二人掌教文武官三品以
上及國公子孫從二品以上曾孫之爲生者屬官有
助教學生典學廟幹掌固等員大學四門亦然大學
博士三人掌教文武五品以上及郡縣公子孫從三
品曾孫之爲生者四門博士三人掌教文武七品以
上及侯伯子男之爲生者若庶人子爲雋士生者國
子直講四人掌佐博士助教之職導以經術講授而

已律學博士一人掌教文武官八品以上及庶人子
之爲生者以律令爲專業格式法例所兼習之屬官
有助教學生典學書學生等員書學算學亦然書學
算學各博士二人並掌教文武官八品以下庶人子
之爲生者以書算自武德初以國子學隸太常寺又
省國子司業及丞貞觀初改國子寺爲監六年復置
國子司業一人龍朔二年改國子監爲司成館祭酒
爲大司成司業爲少司成博士爲司成宣業又於東
郡置國子監其學生於兩京教授咸亨初年改司成
館復爲國子監大司成復爲祭酒少司成復爲司業

本一員至太極初年加一員光宅初改國子監爲成均監祭酒爲成均祭酒長安四年國子監始置直講焉神龍初改成均監復爲國子監成均復爲祭酒天寶九年置廣文館領國子監進士業者博士助教各一人五代因之教化之本學較爲先振古以來歷代而下莫不慎擇能者以居其任業專所以世守師嚴然後道尊馳辨彰乎洽聞抗議明乎適變考論章句則折理惟精刊定闕疑則伏膺罔倦因祖述而綴舊學次甲乙而總郡綱小道可觀靡不覃究用被國獎實耀儒林若乃自負好勝爭名忌前亦著於篇以示

徵艾凡學較十有五門

選任 世業

選任

自漢承秦弊宗尚經術求稽古之士重學官之選歷代而下雖廢置或異而授受之際未嘗輕焉觀其延登鴻碩優隆體貌崇其位著厚其祿廩豈徒冗大官之食重高門之地而已亦將以發揮典籍申明治具顧有益於風教耳非夫大雅宏達博聞彊識究先王之法言蘊專門之素業式可莫二籍甚有聞卽何以稱法師之望恢教授之業敷暢先儒之微旨誘掖方

來之儁士以丹青帝載而化民成俗者哉

漢叔孫通薛人秦時以文學待詔博士

張生濟南人受尚書於伏生文帝時為博士

賈誼雒陽人河南守吳公為廷尉廼言誼年少頗通

諸家之書文帝詔以為博士

韓嬰燕人推詩人之意而作外傳數萬言文帝時為

博士孫商至武帝
年為博士

董仲舒廣川人以治春秋景帝時為博士進退容止

非禮不行學士皆師道之

胡毋生字子都齊人治公羊春秋為景帝博士與董

仲舒同業

轅固生齊人以治詩景帝時為博士

食子公河南人受韓生詩於同郡蔡誼昭帝時為博

士

長孫順淄川人受韓詩於昌邑王中尉王吉為博士

韋賢字長儒魯國鄒人篤志於學兼通禮尚書時人

號稱鄒魯大儒徵為博士

嚴彭祖字公子東海下邳人與顏安樂俱事陸孟孟

弟子百餘人唯彭祖安樂為名繇是公羊春秋有嚴

頗之學彭祖為宣帝博士

施讎字長卿沛人爲童子從田王孫受易王孫爲博士復從卒業宣帝時少府梁丘賀薦讎結髮事師數十年從結髮爲童子即從師學著其早也賀不能及詔拜讎爲博士江公瑕丘人受穀梁春秋及詩於魯申公傳子至孫宣帝時沛人蔡千秋能說穀梁爲郎中戶將綰會千秋病死徵江公孫爲博士劉向以故諫大夫通達待詔受穀梁欲令助之

周慶丁姚二人姓名也宣帝時待詔保官少府屬官也詔五經名儒太子太傅蕭望之等大議殿中平公羊穀梁同異慶姚皆爲博士

王式字思翁東平新桃人受詩於免中徐公及許公式爲昌邑王師昌邑廢式得減死歸家後東平唐長賓沛褚少孫應博士弟子選詣博士摠衣登堂頌禮甚嚴摠衣謂以手內舉令離地也諸博士驚問何師對曰事式皆素聞其賢共薦之詔除下爲博士下除官之詔也

張素安字幼君山陽人與唐長賓褚少孫事王式皆爲博士繇是魯詩有張唐褚氏之學長安門人陳劉許晏亦爲博士

殷嘉東海人姚早河東人乘孔乘姓也音食翰切河南人受易於京房成帝時皆爲博士繇是易有京氏之學

士孫張字仲方早陵人受易於五鹿充宗為博士

孟嘉字長卿東海蘭陵人善為禮春秋授后蒼疏廣

世所傳后氏禮疏氏春秋皆出孟嘉嘉後舉孝廉為

郎曲臺署長

曲臺殿名署者主供其事

歐陽生字伯和干乘人受伏生尚書為博士其子世

世相傳至曾孫高子陽為博士高孫地餘長賓以太

子中庶子授太子後為博士論石渠

林尊字長賓濟南人事歐陽高為博士論石渠

周堪字少卿齊人與孔霸俱事大夏侯勝霸為博士

堪議官令論於石渠經為最高

張山拊字長賓平陵人事少夏侯建為博士論石渠

后蒼字近君東海邳人事夏侯始昌始昌通五經蒼

亦通詩禮為博士

後漢牟長字君高樂安臨濟人少習歐陽尚書不仕

王莽世光武建武初大司空宋弘特辟拜博士

注丹

注音圭

南陽育陽人也世傳孟氏易學義研深易

家宗之稱為大儒建武初為博士

丁恭字子然山陽東緡人

東緡今兗州吟鄉縣

習公牟嚴氏春

秋恭學義精明教授嘗數百人州郡請召不應建武

初為博士

冊術元龜

學較部

卷之五十九

高詡字季回平原般人世傳魯詩建武初為符離長
去官後徵為博士

李封魏郡人建武初鄭興陳元傳春秋左氏學時尙
書令韓歆上疏欲為左氏立博士范升與歆爭之未

決陳元上書訟左氏遂以封為左氏博士

張興字君上潁川鄢陵人習梁丘易建武中辟司徒

馮勤府舉孝廉為博士

張玄字君夏河內河陽人少習春秋顏氏兼通數家

建武中舉孝廉為郎會顏氏博士缺玄試策第一拜
為博士

戴憑字次仲汝南平輿人習京氏易年十六郡舉明

經徵博士

伏恭字叔宥瑯琊東武人明齊詩建武中為刺令青

州舉為尤異太嘗試經第一拜博士

甄宇字長文北海安丘人習嚴氏春秋教授嘗數百

人建武中為州從事徵拜博士

桓榮為議郎會歐陽尚書博士缺光武欲用榮叩頭

讓曰臣經術淺薄不如同門生郎中彭閎楊州從事

臯弘帝曰俞往汝諾

周澤字穉都北海安丘人少事公羊嚴氏春秋建武



未辟大司馬府署議曹祭酒數月徵試博士

董均字文伯犍為資州人習慶氏禮建武中舉孝廉

辟司徒均博通古今數言政事明帝永平初為博士

魏應字君伯任城人少好學詣博士受業習魯詩明

帝永平初為博士

李育字元春扶風漆人也漆縣今幽州辛平少習公羊春秋

沉思專精博覽詩傳知名大學章帝建武元年衛尉

馬廖舉育方正為議郎後拜博士詔與諸儒論五經

於白虎觀

楊倫字仲理陳留東緡人習古文尚書和帝元初中

郡禮請三府並辟公車徵皆辭疾不就後特徵博士

周防字偉公汝南汝陽人師事徐州刺史蓋預受古

文尚書經明舉孝廉拜郎中撰尚書雜記四十萬言

安帝初太尉張禹薦補博士

魏邴鄆淳一名竺字子叔博學有文章文帝初為五

官將博延英儒亦宿聞淳名因啓淳欲使在文學官

屬中會臨淄侯植亦求淳太祖遣詣植及文帝即位

以淳為博士

蘇林字孝友陳留人博學多通古今字戰漢末為五

官將文學甚見禮待黃初中為博士帝作典論所稱



刑府元議選任

蕪林是也

蜀來敏字敬達義陽新野人涉獵書籍善左氏春秋

漢未入蜀嘗為劉璋賓客先主定益州署敏典學較

尉

許慈字仁篤南陽人師事劉熙善鄭氏學治易尚書

三禮毛詩論語漢末自交州入蜀時魏郡胡潛亦在

益士先主定蜀承喪亂歷紀學業衰廢乃鳩合典籍

沙汰衆學慈潛竝為博士

尹默字思潛梓潼涪人通諸經史又專精於左氏春

秋先主定益州領牧以為勸學從事子宗傳其業為

博士

晉曹志字允恭魏陳思王植之子少好學以才行稱

武帝時歷樂平章武趙郡太守咸寧初詔曰甄城公

曹志篤行素履達學通識宜在儒林以弘胄子之教

其以志為散騎嘗侍國子博士後遷祭酒


杜夷字行齊廬江潯人博覽經籍百家之書靡不畢

究元帝為丞相教曰今大義頽替禮典無宗朝廷滯

義莫能攸正宜特立儒林祭酒官以弘其事處士杜

夷棲情遺遠確然絕俗才學精博道行優備其以夷

為祭酒夷辭疾未就又除國子祭酒



謝沉字行思博學多識明練經史康帝卽位朝議七廟迭毀乃以大學博士徵以質疑滯不范弘之字長文安北將軍注之孫雅正好學以儒術該明孝武時爲大學博士不宋徐廣字野民好學尤精百家數術無不研覽初仕晉孝武帝以廣博學除爲秘書郎較書秘閣增置職僚轉員外散騎嘗侍郎領較書如故江湛字徽深文帝元嘉末爲左衛將軍時改選學職以太尉江夏王義恭領國子祭酒湛領侍中何敞之領博士

南齊王儉初仕宋爲秘書丞初孝武好文章天下采以文采相尚莫以專經爲業儉弱年便留心三禮尤善春秋明帝泰始六年置總明觀於儉宅開學士館以總明四部書充之又詔儉以家爲府及武帝永明三年以丹陽尹領國子祭酒儉子暕暕子承其後皆爲祭酒不張緒字思曼長於周易言精理與見宗一時高帝建元末初立國子學以緒爲太常卿領國子祭酒武帝時累遷太子詹事永明七年竟陵王子良爲司徒領國子祭酒帝敕王晏曰吾欲令司徒辭祭酒以授張

緒物議以爲如何子良竟不拜以緒領國子祭酒
梁孔休源字慶緒齊末舉秀才爲竟陵王西邸學士
梁臺建典劉之遴同爲大學博士當時以爲美選
伏暄字玄曜臨海太守曼容之子幼傳父業仕齊爲
鄞令高祖天監初兼五經博士與吏部尚書徐勉中
書侍郎周捨總知五禮事出爲永陽內史復徵爲國
子博士復爲豫章內史徵拜黃門侍郎領國子博士
嚴植之字孝源少精解喪服孝經論語及長遍治鄭
氏禮周易毛詩左氏春秋天監二年判後車騎兵參
軍事四年初置五經博士各開館教授以植之兼五

經博士六年遷中撫軍記室叅軍猶兼博士
賀瑒字德璉舉明經揚州祭酒俄兼國子助教大學
博士天監四年初開五館以瑒兼五經博士
明山賓爲治書侍御史右軍記室叅軍掌治吉禮時
初置五經博士山賓首應其選後以東官新出學又
以山賓居之俄以本官兼國子祭酒
崔靈恩清河武城人遍通五經尤精禮傳初仕後魏
爲太常博士天監十三年歸國高祖重其儒術累遷
步兵較尉兼國子博士後爲長沙內史遷除國子博
士

盧廣范陽涿人少明經有儒術无監中歸國拜國子
博士遍講五經尋遷員外散騎嘗侍博士如故
浞峻字士嵩吳興武康人好學遍遊講肆遂博通五
經尤長三禮初為王國中尉稍遷侍郎竝兼國子助
教僕射徐勉奏峻兼五經博士於館講授後為華容
令遷除員外散騎侍郎復兼五經博士

孔僉會稽山陰人通五經尤明三禮孝經論語講說
竝數十徧歷官國子助教三為五經博士太清亂卒
於家僉子叔玄頗涉文學官至大學博士
陳沈文阿字國衛父峻以文學名於梁氏文阿少習

父業研精章句察孝廉為梁臨川王國侍郎累兼國
子助教五經博士文帝時遷通直散騎嘗侍兼國子
博士

鄭均字茂昭東陽人仕梁為西省義學士孝元承聖
中除通直散騎侍郎兼國子博士高祖世祖之世累
遷中散大夫兼國子博士

沈德威字懷遠梁末遊於天目山篤學無倦遂治經
業文帝天嘉初授大學博士轉國子監助教每自學
還私家講授尋遷太常丞兼五禮學博士

顧越字思南說毛詩旁通奧義尤善持論梁末補五

經博士敬帝紹泰元年遷國子博士文帝以越篤學厚遇之除給事黃門侍郎又領國子博士後魏梁越字玄覽博綜經傳無所不通國初以爲禮經博士道武以其謹厚舉動可則拜上大夫命授諸皇子經

李訢爲中書學生聰敏機辨疆記明察初李靈爲文成博士諮議崔浩選中書學生器業優者爲助教浩舉其弟箱子與盧度世李敷三人應之給事高謙子祐尚書段霸兒姪等以爲浩阿其親戚言於恭宗以浩爲不平聞之於太武太武意在於訢曰云何不取

幽州刺史李崇老翁兒也浩世曰前亦言訢合選但以其先行在外故不取之太武曰可待訢還箱子等罷之訢爲太武所識如此遂除中書助教博士

張偉字仲業學通諸經太武時與高允俱被辟命拜中書博士

索敞字巨振燉煌人爲劉昞助教專心經籍盡能傳昞之業涼州平入國以儒學見拔爲中書助教博士平嘗字繼叔研綜經籍安貧樂道不以屢空改操徵爲中書博士

穆弼涉獵經史孝文初定氏族欲以弼爲國子助教

弼辭曰先臣以來蒙恩累世比較徒流實用慙屈孝
 文曰朕欲敦厲胄子故屈卿光之白玉投泥豈能相
 汚弼曰既遇明時耻沉泥滓
 祖瑩范陽人為中書學生孝文召入令誦五經章句
 竝陳大義帝嗟賞之瑩出後孝文戲盧景昇曰昔流共
 工於幽州北裔之地那得忽有此子景對曰當是才
 為世生以才名拜大學博士
 劉芳為通直嘗侍孝文詔以芳經學精洽超遷國子
 祭酒
 董徵字文叢頓丘衛人從博陵劉獻之徧受諸經數

年之中大義精練講授生徒大始末為四門小學博
 士
 崔景儁梗正有高風好古博涉以經明行修徵拜中
 書博士
 北齊李鉉字寶鼎渤海南皮人撰定孝經論語毛詩
 三禮義疏及三傳異同周易義例東魏末舉秀才除
 太子博士文宣天保初詔鉉與殿中尚書邢邵中書
 令魏收等參知禮律仍兼國子博士時詔北平太守
 景崇西河太守綦母懷文等草定新廟錄尚書平原
 王高隆之令鉉與通直嘗侍房延祐國子博士刁柔



參考得失尋正國子博士
刁柔字子溫渤海人綜習經史尤留心禮儀高祖令
教授諸子文宣天保初除國子祭酒博士
張買奴平原人經義該博諸儒咸推重之歷大學博
士
邢峙字士峻河南鄭人通三禮左氏春秋天保初拜
舉孝廉授四門博士遷國子助教又拜國子博士
張雕中山北平人徧通五經尤明三傳廢帝乾明初
除國子博士琅琊王嚴求博士精儒有司以雕應選
時號得人累遷國子祭酒

馬敬德河間人少好儒術留意於春秋左氏舉秀才
中第乃請試經業問十條竝通擢授國子助教遷太
學博士後主天統初除國子博士武平初拜國子祭
酒
孫靈暉長樂武彊人舉秀才射策高第後以儒術甄
明擢授太學博士累遷潼郡太守天統中勅令朝臣
推舉可爲南陽王綽師者吏部尚書尉瑾表薦之徵
爲國子博士授南陽王經
劉軌思渤海人說詩甚精天統中任國子博士
鮑秀諱渤海人甚明禮兼通左氏春秋諸儒稱之天



統中爲太學博士
張思伯河間樂城人善說左氏亦治毛詩章句以二
經教齊安王廡武平初拜國子博士

後周沈重字德厚吳興武康人專心儒術博覽群書
尤明詩禮及左氏春秋初仕梁高祖高祖置學官以
崇儒教中大通四年乃革選以重補國子助教大同
二年除五經博士

盧誕仕西魏爲散騎嘗侍太祖以誕儒宗學府爲當
世所推乃拜國子祭酒

薛慎爲太祖丞相府墨曹參軍太祖於行臺省置學

取丞郎及府佐德行明敏者充生悉令日理公務脫
就講習先大經後子史又於諸生中簡德行純慤者
侍讀書慎與隴西李伯良辛韶武功蘓衡譙郡夏侯
裕安定梁曠梁禮河東裴舉薛同滎陽鄭朝等十二
人竝應其選又以慎爲學師以知儒生課業
樊深字文深講習五經晝夜不倦太祖置學於東館
教諸將子弟以深經學通膽儒者推其博物後除國
子博士六官見拜太學助教遷博士
蕭撝字智遐博觀經史雅好屬文武帝時爲上州刺
史及入朝屢置露門學士帝以撝與唐瑾元偉王褒

等四人俱爲太學博士
熊安生字植之博通五經專以三禮教授北齊河清
中穆休之奏爲國子博士武帝入鄴令隨駕入朝至
京勅令於大乘佛寺參議五禮宣政元年拜露門博
士下大夫

樂遜字遜賢西魏廢帝二年太祖召遜教授諸子講
孝經論語毛詩及服虔所注春秋左氏傳授太學助
教閔帝元年治太學博士轉治小師氏下大夫宣帝
大象中又爲露門博士
隋房暉遠字崇儒嘗山真定人治三禮春秋三傳詩

書周易嘗以教授爲務北齊南陽王綽爲定州刺史
聞其名召爲博士周武帝平齊搜訪儒俊暉遠首應
辟命授小學下士及高祖受禪太嘗卿牛弘每稱爲
五經庫吏部尚書事世康薦之遠太學博士後爲國
子博士

王頗初仕後周武帝引爲露門學士每有議決多頗
所爲高祖開皇初授著作佐郎於國子講授會高祖
親臨什奠祭酒元善講孝經頗與相論難詞義鋒起
善往往見屈高祖大奇之超授國子博士
馬光字榮伯武安人尤明三禮爲儒者所宗開皇初

高祖徵山東義學之士光與張仲讓孔寵竇世榮張里奴劉祖仁等俱至並授太學博士時人號爲六儒褚輝字高明吳郡人以三禮學稱於江南煬帝時徵天下儒術之士悉集內史省相次講論輝博辨無能屈者於是擢爲太學博士

唐徐文遠雒州偃師人博覽五經尤精左傳隋開皇中累遷太學博士大業初擢授國子博士時人稱文遠之左氏爲一時之最

陸德明蘓州人陳宣帝大建中大徵四方名儒講于

承光殿德明年弱冠往預焉後帝禎明中爲國子助

教煬帝嗣位以爲秘書學士大業中廣召明經之士四方至者甚衆遣德明與魯達孔褒俱會門下省共相駁難無出其右者授爲國子助教高祖武德中補太學博士太宗貞觀中拜國子博士

孔穎達字仲達冀州衡水人隋大業初舉明經高第授河南郡博士煬帝徵諸郡儒官卽遷東都令國子秘書學士與之論難穎達爲最補太學助教太宗在藩引爲秦府文學館學士及卽位擢授國子博士貞觀六年累除國子司業歲餘遷太子右庶子仍兼國子司業與諸儒議曆及明堂皆從穎達之說十二年

九月九日 選任 卷之五十九

拜國子祭酒

司馬才章魏州貴鄉人父烜博涉五經善緯候才章

少傳其業隋末為郡博士貞觀初太宗謂侍臣曰隋

末學者凋喪儒教凌遲唯陸德明徐文遠為儒玄壺

與二三年間相次殂歿豈有後進之士經業優洽而

未深用者乎因徵才章及王琰王恭俱辟為博士

為國子助教王恭為太學博士

蓋文懿貝州宗城人武德初為國子助教時高祖別

於秘書省置學教授王公之子以文懿為博士貞觀

中除國子博士

許叔牙少精于毛詩禮記尤善諷詠貞觀初累授晉

大學學兼侍王讀書字遷太子洗馬兼崇賢館學士

仍兼侍讀

馬嘉運繁水人專精儒業貞觀十一年召拜太學博

博王文

羅道綜少為太學生勤於學業高宗末為太學博士

褚無量字弘度杭州鹽官人尤精三禮及史記中宗

朝累除國子博士遷司業兼脩文館學士以母老請

停官歸侍玄宗在東宮召拜國子司業兼皇太子侍

讀及即位兼遷國子祭酒

冊府元龜 學教部 卷之五百九十七 二十二

九
選任
卷之三

歸崇敬字正禮蘄州吳人天寶初以經業擢第授
四門助教轉博士司業德宗建中初又拜國子司業
馬伋京兆人少有經學累登五經秀才及博士三史
科德宗貞元中為皇太子及諸王侍讀憲宗元和初
拜國子祭酒後為散騎嘗侍復領太學
史迴文宗太和初為四門館助教四年閏十二月國
子監以迴及處士成子野蓋繇庚梁德方前越州叅
軍疆鼎徵等皆通經術准長慶元年赦書節文得以
薦聞請勅所在州府給將服許傳遞至都與太學諸
生講訖仍乞委中書門下更加搜訪如有此比准徵

赴廷從之

周田敏初仕漢乾祐中為戶部侍郎兼國子祭酒時
桑維翰執政時或不悅敏者言未有學官兼丞郎
者又言敏長于經義唯學官最稱職維翰乃去戶部
侍郎祇為祭酒加簡較右僕射尋而復除右丞兼判
國學

世業

自夫子之以詩禮授伯魚而有趨庭之訓其後漢武
表章六經始立博士開弟子員設科射策勸以官祿
學者寢盛蓋獲利之使然爾故有父子講習以著專

射策元龜 學報部 卷之三 二十三

門之稱世家祖述以成傳業之美莫不達章句之要
精詰訓之說克繼前緒見推當時以至歷世祚之遐
邈不墜其素風誨生徒以蕃熾益廣乎遺教名家獨
出蔚為儒崇稽古擅譽以階榮爵蓋韋賢有言斤羸
金之非寶夏侯立論謂朱紫之可拾斯不誣矣

漢孔光字子夏孔子十四世之孫孔子生伯魚鯉

名鯉

字伯魚先言其字者孔子目謂謠系不尊其先也

鯉生子思伋伊生子上白

白生子家求求生子真箕箕生子高穿穿生順順為
魏相順生鮒鮒為陳涉博士死陳下鮒弟襄為孝惠
博士長沙太傅襄生忠忠生武及安國武生延年延

年生霸字次儒霸生光馬安國延年皆以治尚書為
武帝博士安國至臨淮太守霸亦治尚書光位至丞
相

士孫張字仲方受易於五鹿充宗官至給事家世傳
業

兒寬受尚書於孔安國而歐陽大小夏侯氏學皆出
於寬寬授歐陽生子世世相傳至曾孫高子陽為傳

士

名高字子陽

高孫地餘長賓以太子中庶子授太子後

為博士論石渠地餘少子改為王莽講學大夫繇是
尚書世有國氏學寬位至御史大夫

韓嬰孫商宣帝時為博士涿郡韓生其後也以易徵

待詔殿中曰所授易即先太傅所傳也嘗受韓詩不

如韓氏易深

滿昌字君都通詩禮為詹事家世傳業

瑕丘公受穀梁春秋及諸於魯申公傳至子孫為博

士

徐良字遊卿受大戴禮為博士家世傳業

夏侯勝其先夏侯都尉從濟南張受尚書以傳族子

始昌始昌傳勝勝又事同郡簡卿見寬門人勝傳從

兄子建繇是尚書有大小夏侯之學勝位至太子太

傳

僑仁字秀卿受大戴禮為大鴻臚家世傳業

韋賢治詩事大江公及許王 大江公即瑕江江公也 又治禮至

丞相傳子玄成以淮陽中尉論石渠後亦至丞相玄

成及兄子賞以詩授哀帝繇是魯詩有韋氏學

王申受嚴彭祖春秋為元帝少府家世傳業

尹更始授左氏傳取其變理合者以為章句傳子咸

官至諫大夫長樂戶將

劉向為中壘較尉子歆為黃門郎河平中受詔領較

尉哀帝初即位大司馬王莽舉歆宗室有才行為侍

中大夫遷騎都尉奉車光祿大夫幸貴復領五經卒

父前業

後漢睦丹世傳孟氏易建武初為博士

高詡曾祖父嘉以魯詩授元帝仕至上谷太守父容

少傳家學哀平間為光祿大夫詡以任為郎中世傳

魯詩徵為博士

耿况以明經為郎子弁少好學習父業

袁山松書曰弁少學詩禮

明說有權謀

曹褒字叔通父充治慶氏禮

慶晉字孝公為東平太守受禮于后蒼號慶氏

禮建武中為博士褒少篤志有大度結髮傳充業傳

雅疏通尤好禮事褒位至侍中

徐防祖父宜為講學大夫以易教授王莽父憲亦傳

宣業防少習父祖學位至太尉

鄧甫德為開封令學傳父業

陳元父欽習左氏春秋王莽從欽受學以欽為厭難

將軍元少傳父業為之詒訓鏡精覃思至不與鄉里

通

歐陽歛自歐陽生傳伏生尚書至歛八世皆為博士

伏湛字惠生琅琊康武人九世祖勝字子賤所謂濟

南伏生也湛父理為當世名儒以詩授成帝為高密

太傅別自名學為高密王寬傳也寬武帝玄孫廣陵王胥後也湛性孝友少

傳父業教授數百人成帝時以父任為博士弟子初

自伏生以後世傳經業湛子翕翕子光子辰辰子

無忌無忌亦傳家學博物多識順帝時為侍中永和

元年詔無忌與議郎黃景較定中書五經諸子百家

中書內中 藝之書也

桓榮受朱曾學章句四十萬言澤辭繁長多過其實

及榮入授顯宗減為二十三萬言榮子郁復刪省定

成十二萬言繇是有桓君大小太嘗章句郁敦厚篤

學傳父業以尚書教授門徒有數百人郁中子焉能

傳其家學焉孫典字公雅復傳其家業以尚書教授

穎川門徒至數百人一云伏氏自東西京相襲為名儒以取爵位而桓氏尤盛自榮

至典而世宗其道父子兄弟代作帝師受其業者皆至卿相顯于當時榮位至太嘗少

卿

鮑永少有志操習歐陽尚書子昱少傳父學客授於

東平位終兗州牧

劉軼字君文父昆受施氏易於沛人戴賓教授弟子

嘗五百餘人軼傳父業門徒益盛位至亦正

鄭衆字仲師從父授左氏春秋子安世亦傳家業為

長樂未央廡令



伏黯以明齊詩改定章句作解說九篇位至光祿勳
子恭少傳黯學除劇令舉尤異太嘗試經第一拜傳
士以父章句繁多乃省減繁辭定爲二十萬言

薛漢世習韓詩父子以章句著名漢少傳父業教授
嘗數百人建武初爲博士當世言詩者推漢爲長

袁安祖父良習孟氏易安少傳良學安子敞及京亦
傳易經教授京作難記三十萬言京子彭字伯楚少
傳父業彭弟湯字仲和亦傳家學諸儒稱其節多歷
顯位安位至太尉

甄宇習嚴氏春秋教授嘗數百人位至太子少傅傳

業子普普傳子承承講授嘗數百人子孫傳學不絕

劉丕博學號爲通儒子寵少受父業以明經舉孝廉

李劭字孟節漢中南鄭人父頡以儒學稱官至博士

劭習父業遊太學通五經善河雒風星當世稱之

宋意字伯志父京以大夏侯尚書教授至遼東太守

意少傳父業

楊震字伯起少好學受歐陽尚書於太嘗桓郁震中

子秉字叔節少傳父業兼明京氏易傳通書傳嘗隱

居教授秉子賜字伯獻亦傳家學篤志博聞嘗退居

隱約教授門徒震少子奉奉子敷敷志傳聞議者以

為能世其家敷早卒子眾亦傳先業震位至太尉

孔奮少從劉歆受春秋左氏傳第竒博通經典作春

秋左氏刪刪定其義也奮晚有子嘉官至城門較尉作左

氏說云說猶今之疏也

牟長習歐陽尚書為博士子紆又以隱居教授門生

千人

曹曾從歐陽歆受尚書門徒三千人位至諫議大夫

子祉河南尹傳父業教授

崔駟通詩易春秋子瑗字子玉早孤銳志好學盡能

傳其父業年十八至京師從侍中賈逵質正大義逵

善待之竇憲為車騎將軍辟駟為掾

賈逵父徽習左氏春秋兼習國語周官又受古文尚

書於途揮學毛詩於謝曼卿逵悉傳父業弱冠能講

左氏傳及五經本文以大夏侯尚書教授雖為古學

兼通五家穀梁之說自為兒童嘗遊太學不通人間

事位至侍中

楊統曾祖父仲續代修儒學以夏侯尚書相傳

郎顛父宗學京氏易能望氣占侯顛少傳父業後拜

郎中辭不就

翟酺四世傳詩酺好老子尤善圖緯天文曆筭位至



將作大匠

張酺少從祖父充受尚書能傳其業又事太嘗桓榮
勤力不怠聚徒以百數位至太尉

孔僖二子長彥好章句學季彥守其家業門徒數百
人官至臨晉令

馬日磾字翁叔馬融之族子少傳融業以才學進與

楊彪盧植蔡邕等典較中書歷位九卿遂登台鼎

蜀許慈字仁篤治易尚書三禮毛詩論語子勛傳其

業復為博士

尹默字思潛從司馬操宋仲子等受古學皆通諸經

史子宗傳其業為博士

吳虞翻太嘗時為騎都尉翻初立易注奏上曰臣聞

六經之始莫大陰陽是以伏羲仰天懸象而建八卦

觀變動六爻為六十四以通神明以類萬物臣高祖

父故零陵太守光治孟氏易曾祖父故平輿令成績

述其業至臣祖父鳳為之最密臣亡考故日南太守

歆受本於鳳最有故書世傳其業至臣五世

晉王愆期父接官至征虜將軍嘗注公羊又撰列女

後傳愆期流寓江南緣父本意更注公羊又集列女

後傳云傳云



范宣光善三禮嘗以講誦爲業子輯亦以講授爲事
宣以太學博士散騎郎竝徵不就
宋杜坦祖預注春秋左氏傳坦與弟驥傳其家業坦
位至左將軍
南齊裴昭明河東聞喜人祖松枝大中大夫父駟南
中郎叅軍昭明少傳儒史之學爲太學博士
梁明山賓爲國子博士卒其子興道亦傳父業歷官
太學博士
褚脩父仲都善周易天監中脩歷官五經博士脩少
傳父業兼通孝經論語

范縝字子真尤精三禮爲中書郎國子博士卒官子
胥字長才傳父學起家太學傳

賀瑒字德璉會稽山陰人祖道立善三禮爲尙書三
公郎連康令瑒少傳家業爲五經博士子革字文明
少通三禮及長徧治孝經論語毛詩左傳

賀琛伯父瑒爲世碩儒授經於琛高祖聞琛學術召
見文德殿與語悅之謂僕射徐勉曰琛殊有世業仍
補王國侍郎俄兼太學博士

孔奩通五經尤明三禮歷官國子助教三爲五經博
士子叔玄頗涉父學官至太學博士奩兄子元素又

善三禮有盛名

司馬筠字貞素博通經術尤明三禮累加左丞出爲
始興內史卒官子壽傳父業亦明三禮歷官尙書祠
部郎出爲曲阿令

沈峻爲五經博士卒子文向傳父業尤明左傳太清
中自國子助教爲五經博士

陳杜之偉字子大吳郡錢塘人家世儒學以三代傳
門父規良奉朝請之偉有逸才七歲受尙書稍習詩
禮畧通其學十五遍觀文史儀禮故事時輩嘉其早
成累遷大中大夫

顧越字思南吳郡鹽官人所居新坡黃岡世有鄉較
繇是顧氏多儒學焉越少孤以勤苦自立說毛詩旁
通異義梁世補五經博士

賀德基字承業世傳禮學祖文發父淹仕梁俱爲祠
部竝有名當世德基於禮記稱爲精明居以傳授累
遷尙書祠部郎德基雖不至大官而三世儒學俱爲
祠部時論美其不墜焉

後魏李曾少治鄭氏禮左氏春秋以教授爲業三辟
功曹竝不就子孝伯少傳父業綜群言孝伯兄祥字
元善學傳家業鄉黨宗之

江式字法安陳留濟陽人六世祖瓊字孟琚晉馮翊太守善虫篆詒訓永嘉大亂瓊棄官西投張軌子孫因居涼土世傳家業祖疆字文威後魏太延五年涼州平內徙代京上書三十條各有體例又獻經史諸子千餘卷繇是擢拜中書博士式少傳家學兼著作郎

劉獻之饒陽人善春秋毛詩每講左氏盡隱公八年便止云義例已了不復須解孝文幸中山詔徵典內較書固以疾辭四子放古爰古參古修古竝傳父詩北齊馬敬德河間人少好儒術負笈隨大儒徐遵明

學詩禮畧通大義遂留意於春秋左氏爲諸儒所稱累授助教博士侍講東宮子元熙字長明傳父業兼事文藻累遷散騎侍郎待詔文林館後主武平中皇太子將講孝經有司請擇師友帝曰馬元熙朕師之子可令教兒儒者榮其世載

顏之推字子介琅琊臨沂人父勰世善周官左氏梁湘東王諮議參軍之推早傳家業博覽群書無不該遍湘東以爲國佐嘗侍

後周盧辨字景宣范陽涿人累世文學父靖太嘗於辨少好學博通經術舉茂才爲太學博士以大戴禮


未有解詁辨乃注之其兄景裕為當世碩儒謂辨曰
昔侍中注小戴今爾注大戴庶纂前脩矣
隋包愷字和樂東海人其兄愉明五經悉傳其業為
國子助教

庾秀才為太史大中大夫藝術精通子質復為大夫
令質子儉亦傳父業兼有學識

唐顏籀字師古琅琊臨沂人祖之推仕北齊為黃門
侍郎有盛名父思魯少以學業稱武德初秦府記室
參軍事師古少傳家業博學群言多所詳練尤精詁
訓善屬文累遷秘書監弘文館學士卒

許孟容京兆長安人父鳴謙究通易象官至撫州刺
史孟容少以文詞知名舉進士後究王氏易登科授
秘書省較書郎

蔣乂字德源祖環太子洗馬開元初弘文館學士父
蔣明累遷國子司業集賢殿學士代為名儒乂史官
吳兢之離孫幼便記覽弱冠博通群籍史才尤長宰
相張益見而奇之署集賢小職



冊府元龜

卷之三十三

冊府元龜

